

知  
足  
齋  
詩  
集

知足齋詩集卷第八

庚戌至癸丑

大興 朱珪 石君

予與定悅和尚識面在甲子乙丑間時予纔十四  
五歲師長予一年予今六十矣每歲祭掃西山及  
于役往來過小井必憩禪房啜茗話舊感而賦此  
相逢道左各童騃彈指流光鬢已皤桑下那曾三宿駐  
井中應悟一空來觀河見性原無皺掣電飛塵不惹臺  
四十七年如幻影東風著樹又開開

雙江行

爲汪輝祖進士母  
王徐兩節婦作

定山江流蕭山西其東浦陽之江東北折入曹娥支海

門潮汐浩呼洶雙江流合清漣漪蕭山汪氏有賢母所  
生曰徐惠且慈有王繼室厥考方尉淇尉以艱罷遠游  
粵旅窮于次俄以喪輒歸是時二母交慟欲殉之上有  
老姑下有穉孤饒饒小叔負且逋汝咷我咽撫厥子子  
讀書兩母喜子書不熟我扑爾勸兒無娛子升于鄉徐  
殯在堂子成進士王終于是進士念母心如摧泣血陳  
狀上之

天子旌其閭徧乞當代鴻儒詞銘誄紀傳雅頌詩褒成  
于部播四維昔王晝夢元白二鳥共哺五色雛朱衣暴  
庭取覆之雛今挾天苑長離不見二母鵲巢空在樹長

江湯湯直到海願我母節長與江海清無涯

讀華元化先生傳

神龍蟄泥淵妙藥試泝泝先生喬仝流豈獨扁倉敵騰騰犬奔蹄蜿蜿蛇挂壁奇術不可知破腹聊湔滌天欲痛老瞞苦讀陳琳檄又令天倉舒吞聲卵已殪空嗟醫國手莫援蒼生溺超然上九霄元氣調六幕我嘗夢謁之飲我青黏瀝亭毒散膏肓氤氲燐焱披史讀陳編沛讎緬遺蹟何當薦明馨庶勉勤惠迪

喜雪

丁東起宵鼓絳縹聆霞花中夜試兀坐斗覺衾欲加衣

單客可念麥潤農亦嘉素心淡溫飽吏職塵桑麻夙興  
窺我園高下覆壟窪卉木擬瑤林菜畦撒瓊沙來牟或  
可飽民樂官無譁天平鑒微誠臣願豈敢奢

謹次

皇帝在書房時冬夜展翰寄懷元韻

明月照千川不隔江之永素心共千里昕宵必三省恭  
惟

齋个清斗轉天機靜詩情觸遠緒泉汲金井綆微斯芻  
蕘言亦入

聰聽領愚誠詎暄獻誤書類燭秉春隨四序升氣和萬

彙幸威儀詩戒懿興居書慎罔百言重百朋璨若瓊禾  
穎何以致中孚鳴和喻鶴警

御製墨雲室記恭跋

黃山松結黟山雲廷珪鍊墨通犀紋具茨贈僧逾拱壁  
千年

紫幄騰珠煥南唐世工久愈貴驪龍噓氣空其羣隔囊  
半丸走潘谷黃金不屑論鎰斤蘇黃珍重已如此後更  
罕覩虛傳聞忽邀

睿鑒豈繁物觸石膚寸方氤氲名以墨雲貯

溫室普潤萬寶

天心欣

壽超金壺五千字

心傳松棟十六文依仁游藝各有取

三希翰墨交光所霽卿九霄拜

嘉賜沫胝萬誦榮沐薰翰林風月未足數農功甘澤

宵旰勤祇敘九疇

省箕畢阜成兆室蕃耕耘

乾隆辛亥季夏書于小涪雲峻遺彙後

門巷烏衣望獨高星郎槎使夙宣勞不辭小隱珍鸞翮

自有餘輝蔭鳳毛甬海班荆憐臭味

丁未戊申晤君涪于寧波書院

山宿莽感風騷素心三復賡蘭韻廿載歸來那愧陶君次珍素心蘭韻詩余原句云誰與託臭味干載惟陶公

重題外舅陳雨霖先生冒雨尋菊圖

黃花秋雨香滿山青鞵元擎從幽攀思南太守上官去  
嶺煙簪霧披榛菅歲當己卯夏暑潦窮行萬里衝潺湲  
艾耆何方汲甘井笠屐到處畱荒蠻舊題此圖驚隔世  
栽栽冰映初蒼顏三十三年一電掣玉樹彫落花枝刪  
翁癸未臘世伯仲兩君俱不壽予妻亦逝山丘華屋古同感對之能不雙潛  
潛季子弄藏重遺澤昔爾未齟今將頒願我霜髭惜晚  
節端憂無力甦痼癭餐英飲露夙有願何日歸老能投



閒金霞茅屋聊信宿結籬聽雨看爛熳墓田可耕松可  
爨贈爾一曲雉子斑方祝古師生子素心邂逅足情話山風吹  
帽谿流環神仙有無且莫問雪芽試漑黃庭關

吳山尊用東坡聚星堂雪禁體物語韻見示次之  
春風未扇青條葉冬令催移黑山雪兼旬腸慣菜味腴  
一曉眸驚豔色絕同心勞我歌正喧如願爲誰屐欲折  
來牟出土纔蒙茸鰕鯉伏沙真撲滅張弓一拊赤子呱  
織雲三日黃姑掣童戲欲作鱗之而姤嬌試點額裴纈  
蜀荒吹獬可驅羣天策昆刀快泥屑載塗已聞青海過  
見睨佇看紅旗瞥豚蹄且祝滿篝車民欲天從非駕說

徑須暢飲拋青春醉歌起舞如意鐵

錢忠懿王金塗塔

塔高今尺三寸八分重三十六兩四版合成中  
刻吳越國王錢宏俶敬造八萬四千寶塔乙卯  
歲記其一空其三下各有一保字外四面鑲佛  
歷劫捨身事跡約略可辨上出四角八觚外金  
剛八內佛相四其下趺每面羅漢三蕪湖陳明  
府聖修之子廣寧得之於徐竹濤竹濤得之於  
紹興壽量寺僧並錄明憨山僧德清記於冊云  
萬歷初常熟顧耿光造其父憲副一江公塋地

中掘出一小銅塔高五寸許如阿育王塔式內刻款識一十九字外四面鑲釋迦往因本行示相前則慈利王割耳燃燈後則尸毘王割肉飼鷹救鴿左則薩埵太子投崖食虎右則月光王捐捨寶首文理密綴滲以金飾顧爲太史錢公母舅因公爲忠懿王之後以塔付之公得此自號聚沙居士志因也乃送興福寺蘭若供養余東游訪太史過洞聞上坐覩其塔奇其事因記之萬歷四十五年佛生日熬山沙門德清記按記稱高五寸許蓋塔上有頂作浮屠狀今損缺

矣又所稱飼鷹救鵠相殊不肖則此塔與慈山  
所記是一是二未可知也按薛居正五代史俶  
爲武肅王鏐之孫漢乾祐元年正月十五日胡  
進思迎立之是歲戊申茲塔造於乙卯俶嗣爵  
之第八年爲周顯德二年距今乾隆壬子實八  
百三十八年也又按宋史俶名本二字以犯宣  
祖偏諱去之今刻二名則在宋前無疑考宋周  
文璞方泉集姜堯章金銅佛塔歌所云上作如  
來捨身相饑鷹餓虎紛相向又云錢王納土歸  
京師流落多在西湖寺爲得其情事而朱竹垞

檢討王漁洋尚書俱未見其物臆斷爲錢武肅  
之事則誤也朱又云鄉人蔣爾齡得一版作放  
下屠刀立地成佛相則知此塔所鑄故事本不  
一也今此完好無缺猶見五代時舊物亦可珍  
矣爲詩記之

陳君遺我古銅塔金塗赧駁般匱匣厥高四寸重六鎰  
范像鏤文辨可揭吳越王俶乙卯年敬造八萬有四千  
顯德二載周禁烈

是歲周世宗  
煬像鑄錢

開國五世錢江偏佛說

捨身事茫昧薩埵餒虎同歌利月光慈力解六根空色  
人天摹瑣碎巋然四角環金剛功希孔雀阿育王江潮

歸海表忠峙十四州土完保障堯章頂禮歌文璞王朱  
傳聞譎武肅剎那八百卅八春恒沙湧現金輪昱

雜詩九首

我聞鬱單越大樹菴婆羅草輭豔孔翠蹈地平不陂天  
行無冬夏四序咸協和中夜降甘雨好風清晨過光珠  
炊釜熟杭飯香玉瑳男女常少壯色好心無他目成適  
所願妙勝歡娛多生兒置交衢授指乳湧醯自然衣食  
足千歲方婆娑考終卽生天更上兜率陀

我聞混沌闢地味如醍醐諸天一擲指腹果顏更姝種  
此食色性滅彼光明軀樂哉八萬歲衰盛相乘除遂令

閻浮界偈仄爭鎔銖地肥日以薄身光黯不舒何當返  
太始一叩天淨居

我聞壹壹交洪雨注車軸風輪吹沫飛層空鏤金屋中  
貫須彌山四環光相燭十天治其都殊量同所欲華冠  
忽以萎爲樂苦未足中有超覺者舍旃觀我獨我復何  
有哉主默客不速兩忘成與虧一鼓無弦曲

我聞大鵬鳥搏翅海水翻頓食千頭龍鯢鯿安足吞翽  
翔四天廓胎卵蕃子孫八千壽命盡自投金剛山骨肉  
旣銷鑠心出明珠丹難陀取玩之纓絡光貝珊可爲貪  
者戒及早持八關

我聞阿須倫采華四天下布海欲釀酒不成空自咤海  
波深及邠崑頂高方跨手撼七寶宮亢戰力可霸豈知  
虛空力百體嗟已化逃魂入藕絲微比蚊睫罅可爲夸  
者懲勿學鵩雛嚇

我聞過去世雪山翺鸚鵡反哺報所生銜穗勤復取田  
者羅得之能言一何苦非敢盜汝穀哀我父母瞽又聞  
鹿皮睽深山奉恃怙見舛迦夷王天釋爲悲怒神藥瘡  
而甦二親目亦瘡如來說前因惟孝種佛土

七佛皆有子耶輸乃次妃何曾外人倫不著如鬘衣是  
身青蓮華出水根自肥三天一說法眷屬同皈依六根



既解脫五欲何順違莊嚴寶海藏清淨摩尼輝願登白  
牛駕莫戀園林菲

我聞世尊說五濁惟娑婆於此作功德千倍佛界過火  
中栽蓮華妙勝香最多神龍掉其尾九野行滂沱發願  
詎不大力歎將如何

我聞忍辱仙端居智慧林歌利挾脊屬游獵方酣沈衆  
娥謁仙喜聽法心愈欽歌利覺而駭遂鹿相追尋問仙  
鹿何往慈憫口若瘡七體遭割截骨肉何淋淋誓將度  
凶戾法忍忘嗔心帝釋爲震動神變來訶禁金軀倏完  
好膚腠無損侵未來五百世成此百鍊金乃知懲忿火

須用恒河深

客各有懷無以解之姑爲談世外事所謂何不食  
肉糜也偶讀古樂府來口大難篇極陳芝草仙藥  
而申之曰親交在門飢不及餐歎人情今昔之同  
而學道之所以難也爲仿其體卽以自嘲

來日苦短飛光電過與子邂逅聽我高歌

解一

天有兜率

地有蓬萊神人遨遊千春嬰孩

解二

中夜氣至壹壺降雨

甘露神漿靈娥哺乳

解三

客聞咄咄家無黔突鄧林遙遙

莫知我渴

解四

富貴心勞貧賤鬱陶誰能度世仙人王喬

解五

吹笙洞簫仙乎下來晨餐有命宵尊方開

解六

天門開

天門開鳳凰下交光珠照九野萬神續紛騎黃麟白象  
於菟辟邪洞觀赤子心戢戢稂莠呼儔嘯侶歌踏龍  
骨車

帝憐蟣蝨岷撮微塵戴篋篋汗出裂膚熱泥沒肘召跋  
難陀喻江淮河朔汝三日降霖滂沱跂跂脈脈嚙嚙呀  
呀流膏飛淙滿甌窶注汚邪蒼浪高天俯瞰卑聽慈于  
翁媼爍于電霆傳相告語勿侮景與形臣聞

八旬聖人禱雨步上龍壇臣聞

八旬聖人禱雨步上龍壇願斟天稷水噴洒魏趙燕同

聲歡呼

皇帝壽億萬年

六月十九日龍挂

神龍雙空垂飛瀑千尺上童耆驚拍手靈昭卓莽蒼夏  
哇方籲咨秋節逼沆碣齋心近七日密雲時畜養望宵  
暫灑欽伏半緬滌盪良辰蓮界淨慈願通眸嚮青天一  
渙汗受命捷于響蛟螭擺鱗尾倒景露偃疆霽然萬斛  
珠赤水傾象罔我苗淳以甦農歌媚厥饒自今祝旬膏  
相期賽秋穰何以酬龍公二簋可用享

偶感八首

未老營菟裘先冬謀旨蓄人生無百年魂去空枯髑飄  
搖何所棲渙若輿脫輻至人鍊精氣凝神元牝谷及其  
乘化時得意隨久速此理本尋常秋稼春播穀如何秦  
漢皇海外求餐服盍歸寸田中萬徧黃庭讀

化人空四大聊作中假觀如雲雨萬物青穹淨無端了  
此一合性萬天何其寬善解六結巾手振波羅紈是理  
甚分明波旬說空調神功真不有一拂花雨霞

儒者如種樹培根俟其枝兩暘更風露灌溉各有時開  
華何灼灼綴實復離離梁棟或可貴斧斤亦不辭松柏  
傲歲寒桃李妍春姿剛柔取震巽曲直隨所宜木神固

不二薪盡火自移朝聞夕可死名理誰能窺

眼中相見人皇皇各有求豈伊不慕道所答非所諏有  
如在波濤而與度輪轉人生祇一身萬感紛千憂何時  
待子暇共子談天游天平蒼蒼遠噓息同摻流我憶古  
達者榮公與莊周長歌行帶索至樂非濠鯈晝思夜或  
見素心永綢繆

人生急衣食動與憂患嬰當其無事日幻妄希奢榮搢  
搢閱寒暑鼎鼎何所成君子思厥職越畔非敢耕於此  
得閑暇收視觀我生譬如餐與寢晝夜自有程養之以  
冲虛恬知妙合并古稱三不朽太上忘吾情

人情競所少已得無餘歡誰能借彼鑒而令我暫寬以此喻求道孳孳敢晏安金剛心不住龍用神無端禹功不矜伐孔過猶假年河伯驚望海愚公志移山羣生各有適殊趣同一觀

般陀識暗鈍兩言不成知誦掃帚若失誦掃帚已遺專精不退轉聲出涕欲隨六年忽大悟神慧除貪癡騰身跌虛空驚倒婆羅師蠹魚飽萬卷不如脈望飢多聞誠足貴守一道在斯

惟皇示彰瘴景響符形聲風霆皆教育用意在好生欲假一夫善洗此衆沴盈有能若厥志愛護相提擎初猶

試摩礪久乃扶欹傾如何人不信巧與天爭衡遂令大  
慈父雪涕隨鞭撻天心見坤復梅蕊芸始萌吾言非河  
漢請叩魯兩楹

聞章仙洲編修赴

平生夢繞水雲鄉慕道修文尚渺茫一載離尊成永訣  
去歲六月初旬別皖十年善果詎全荒萱帷養志貧非病蓀命多  
情感易傷君連年有西河之感最是驚風吹逝水蓬山何處問梯  
航

七月十五日望雨

四牛欲鬥不肯合空雷密雲風颯颯蔚藍高高不敢捫



龍骨踏翻腰脰摺齋蔬半月心如熏垂楊左肘膚苦瘡  
乘軒無功鶴自愁堰水將枯魚可罾淵珠誰掇驪睡酣  
天壺不聞娥笑雪乾憂何術暴尅巫直欲飛精叩閭闔  
豈惟秋炕微稻蟹安望冬饒通蜡臘宵慈或憐蟣虱焦  
氣縕暫教山澤沓蒼茫靈意不可知一夜冰夷鼓鏜鏜  
相呼賓從歌澠陵徧賽祗壇醉疊榼

謹次

皇帝在書房時寄懷三首元韻

取善納壤流論功次梓匠天風吹鸞音千里素心暢鹿  
鳴喻周行虎門觀德尚下濟旣勞謙上達方大壯別來

忽三秋引商送高唱鴻書賁南遠斗蓋惟北仰圓月渡  
銀河翹首當宵望朗然心鏡同明聰超婁曠

原泉進盈科行潦亦挹注養深貴有本實勝乃流譽憶  
初奉光華歲月一何遽中間使浙聞皇華感征路十年  
侍經帷下問勤禮遇俄承皖疆命飲冰惕齋署積書懷  
已盈望遠思難駐何以助高明日新在斯曙

月露遠懷人暘雨勞問歲誰云別離久不吝金玉惠南  
箕北有畢雖遠光相逮寥空碧天高夢繞飛雲在肫仁  
篤本根藹吉流餘愛秋實映楓林黃髮思老輩粹然天  
瑜溫不厭他山淬勉茲報瓊投詎敢效忠誨

抱甕園菜根香軒聯句

同人快盍簪序齒試敵菜月藏秋中輪

陀盤

星聚雪堂背

糝金桂粟零

黃鉞

綻碧菊叢菱掃徑開酒尊

黃涿

擘牋授吟

輩錦繡競鋪列

凌廷堪

丹青互藻績風辰和簾竿

張若采

霜

令磨戈鏃江鍊射遙明

陀

山眉畫長黛不速三客來

鉞

賈勇兩軍對偏或承以伍

涿

鼓懼衰于再已滋田園趣

延堪

詎告老莊退芥子衆妙函

若采

瓠實千金貸雁木擇材

陀

馬指選義礙懷新悅青葱

鉞

去陳撥蒙昧譬彼調

尊羹

涿

當以鹽豉配有如治蔬畦

延堪

母致耘鋤廢蔬

萃筐筥

采

芹茆升薤薤拔葵愧公儀

陀

薤草記小

邪馮諫傳鉞蓬直荀論載茶蘚五味偏洙葑菲六利在

稟茲置薤心延不改斷薺態道腴挹天漿采仙蓄發地

肺肉食嗤班君陀苻芼薦文妃微材費薪蒸鉞枯蓼飫

沆瀣慚非桃李投洙欣緝蘭茝佩師門識淵源延講席

荷津逮是日日未晡采八月月將晦論心數年隔陀努

力隨時愛況茲侍履約鉞何幸依泰岱時陪下帷窺洙

請學抱甕漑聆論竊與元延徵典并及內臆腹儉一字

采蚌胎含百琲詩成書八分聊倩阿買代陀時五姪錫用侍坐

重陽次日候題名錄有作示諸君

木樨香散菊香開九點齊州馬蹴埃幾路登雲排雁字

無邊吹海暴鯨腮等閒袖手聽棊落結習關心見獵來  
漫詫薤珠同鄭重屈伸消息屬人才

晨殮

晨殮啖蔬菜如讀淵明詩清腴有至味舌本生華滋頗  
疑六識根違順非真知豈獨嗜芻豢濃淡各有宜列鼎  
羅珍羞目食徒自欺潘陸競雕績雖美情不移投箸聊  
自哂況復有朝飢

書明楊文襄與曹總戎雄扎卷

卷爲周方伯樽  
所藏周雲南人

安寧總三邊實繼王越後遇衝花馬池原涼安屯畝奄  
瑾速錦衣大功中掣肘再起相武宗伯安資師友遂成

擒濠勳反正兩不朽公與曹雄書御將如臂手淋漓遺  
墨藩珍重比璋卣方伯欽維桑傳觀光照牖誰與社稷  
臣論世感星斗請爲叩鐘鼗敬告九牧守

乾隆癸丑元旦奉到

恩賜玉如意紫貂裘恭紀

臣蒙

恩旨寄閱

御製十全記

喇嘛說

修德修刑論

書隋文

帝改元事文四篇

臣

跪讀敬繹具摺

奏覆奉

硃批覽詞過頌矣欽此

臣

隨恭繕成冊各綴跋於後並

十全頌一篇乾隆五十七年十二月初六日進

呈初七日奉

特恩賜

臣

玉如意一枝紫貂褂一件眞

異數也伏

念

臣

學陋才庸夙以文字受

特達之知茲守

土在外歲壬子一年之內奉

旨寄朱珪閱看

御製文共十篇賡歌喜起之盛咫尺接

光華而

巍功煥章豈克仰贊萬一況廓爾喀歸降歸順奏

凱班師中外禔福

臣

欽抃作頌筆不能宣乃蒙非

常

寵賚尤外臣之所不敢望惟有仰承

敷錫之恩與普天億兆自今至於萬年保極無極  
謹述紀

恩詩二首

天光珍重照

臣

身嘉玉良裘

好賜申虹氣吉祥纈采就紫華安襖被

絲綸捧來元日隨心祝舞向同雲渙汗春

時方  
渥雪佩服

醴恩慙報稱願推

宵旰煦烝民

卿煙

藻衮望層霄何意



龍光下蓼蕭西域闐琛宜解塵東平蕃錫重豐貂拜颺  
祇愧錐蠡拙拊勉難言暄潤調獨有微誠銘在笥萬年  
垂拱頌

軒堯

韓城相公叔度員外寄我鹿尾遂以餉客有作

麋獻分來鼎食豪星郎遠惠到江臯大烹直比牛肥臠  
小切何須狼臠膏豐尾獨參緣督理顛顛漫與飲醇饗  
客有大欲  
存者嘲之味腴應飾齋厨嗇珍重承筐薦野蒿

次管農部世銘見寄韻

三年素食耻頤顛責華還須老友賢遷地易華非幹木

出山難保是清泉敢誇折角談經宿恐愧揮鋤異席年  
天下才今應有屬無能底用簸揚前

狄李氏詩

教授堡之女夢鶯之妻姑于宜人

李君有女秉祖教適狄婉婉宜姑慈勤心侍疾奉湯藥  
割肱濡縷膏肓治左右漏言姑慟劇夫從母死婦獨婆  
夫有伯仲尚競爽若敖豈遽悲餒而汝父與舅感嚶谷  
闐幽旌淑傳歌詩我聞此事增嘯歔憶我有女馮郎歸  
爲母剜臂瘕淋漓三十輻斫婆婆枝念之老淚猶酸嘶  
蓀命夢幻芳菲菲李君無以愴我爲

乾隆癸丑五月二十一日奉到

恩賜絳色庫紗一端恭紀

絳霞一朵照江濱

加賚殊榮賁外臣細葛香羅應遜綺鮫綃蟬翼不飛塵

離宮丹製承端午

頃方拜端節藥錠之賜

異命鉢衣特

錫申深愧鵲梁難稱服職思暑雨勉勤民

示孫涂元五首

五倫親居首百善孝爲根孩提知愛慕定省勤晨昏無  
父何教育無母誰慈恩父子乃天性因之有祖孫汝生  
早失怙視祖親勝尊汝母苦少寡待汝寒回溫何以解

母鬱何以慰父魂讀書勉爲善顯揚佇

綸言娶婦侍盟櫛生兒娛蘭萱聞聞氣豫順和藹充乾  
坤本原不努力後悔難攀援

尊卑實大義有

君有臣民士爲四民秀何況家搢紳粒食皆天祿日用  
資官緡暴殄損餘福惰游曠良辰汝年已十六失學猶  
蒙屯爾雅汝父書手澤摩未湮三經纍舉授禮記方斷  
斷龜勉勿自棄溫故期知新統袴衆所鄙清白無憂貧  
作忠先思孝蓼莪念酸辛

汝生鮮兄弟羣從方怡怡推類以事長汝伯當敬祇昔

汝父友愛同牀聯壺簾眼前子與孫每戒家道睽勿使  
乾餼愆尚繹常棣詩遜悌乃全孝何以敦倫彝

學成賴明師善益資良友師勞學鮮功友損善何取黃  
子長二齡經笥腹富有吐奇作詩文麟鳳輝郊輶愧汝  
百不如照火厲自醜平地可爲山莫便安培塿勿逐羣  
奴娛鹵莽雜稂莠親仁志上達麗澤兌初九

三教皆有子二南先齊家易占男女正書協嬀汭華俗  
衰溺牀第矯枉行奇袤宴爾懷耽毒若敖餒可嗟或過  
或不及庸行何隆窳我生無二色汝妣瑜少瑕中年一  
長別獨處甘匏瓜自調嬰與蛇默轉氤氲車成眞吾豈

敢望道或未賒五倫庶無悖提命非浮夸

乾隆癸丑中秋既望奉到

恩賜奶餅一匣恭紀

恩釀膏露

絳霄端珍餌

頒來自大官天乳玉酥金鼎煖地肥香草雪山寒百花  
甜徹中邊味十字圓成內外丹

好賜頻仍慚素食勤思求牧問艱難

寄壽紀曉嵐宗伯譚蒼亭少司寇兩同年七秩

憶昔歲丁卯我初十七齡覃溪年十五

翁閣學

同舉京兆

廳紀伯冠倫魁口吃詞建瓴譚侯西江秀南斗劒發矧

子固與東坡誰敢分尹邢當時濟濟彥位業排真靈詎

斟彭老雉但辨終生誕袞袞卅七載耿耿八九星牙纛

劃滇豫馮穆兩中丞苗雨膏江寧陳方伯奉茲徐公近光尺徐中丞績

王子老汗青王太史燕緒伯鸞書拱壁梁侍講同書潁守廉絕涇

王太守秉韜王尊馳駿坂王方伯懿德杜子煮松苓杜明府鴻儒寥落

布中外泮渙交蘋萍宗伯扛健筆司寇欽祥刑踐台兩

壽耆夷臯賡姚廷七十肯稱老蚪髯目析螟九苞翺

小鳳譚公子光祥七閣勤聚螢譚宗伯遙知清虛堂玉山傾

銀鏘嗟我阻江皖仙侶翹蓬溟何當左右手追躡清

銀黃花重晚節蘭臭方聯馨卮言祝二老蕊珠貫三庭  
金塗塔歌寄和陳中書慶槐宋孝廉世榮葉孝廉  
騰蛟

忠懿四世傳祖鏐金塗鑄塔工雕鏤豪吟鼎舉陳宋葉

耳食劒映王

漁洋朱

竹垞周

青士

仙李根僵葺分照錦衣樹擁

潮倒流碧波投筆馘困鬼倂因倂立雄弓裘湖山梵剎

遍功德金券玉冊齊高樓柴周銷象此冶造莊嚴無相

誰劣優銅花剝蝕捨身幻斷風斷水厚泡漚月光尸毘

難辨別餓鷹餒虎酣驅劉一方鞭笞到轂卵繭絲保障

功罪侔十三州籍獻眞主愛子剃度方焚修八萬四千



塔何有筏舍誰繫般若舟器猶求舊上天府摩尼帝鉢  
聯共球藥階槐邸富手筆遠擲空費黃金掘老我齋腸  
學鈴語迦陵難叶聲鉤輈寒宵籠月燭見跋勉賡三子  
慚坡歐

知足齋詩集卷第八終

知足齋詩集卷第九

甲寅

大興 朱珪 石君

謹次

皇帝在書房時仲冬晦夜喜雪元韻未有見憶之句

玉泉蠶涌三素雲龍歆鳳嘖連昕曛紫皇拈花香御笑

恒沙餅餌凌霄聞闐闐無風曉栗烈走馬天街奏新雪

金鑪伏火靜氤氲釳砌瑱珠勢未絕

丹綸咨牧已更番

十一月二十七日奉

硃批不望

奏十二月十一日火牌

廷寄詢

雪珪以十一日得雪由驛馳奏

宵衣耄念勤黎元

御批欣慰來同日

十二月二十七日連奉

驛使霖膏報

殊批欣慰覽之

庶蕃 白雪陽春引下里三年小別心如此開甲雲依  
玉葉薦由庚笙和嘉魚鯉

謁余忠宣公祠登大觀亭

開歲三日出郭遊登眺上達之高樓長江千里東入海  
九華溟濛如蓓蕾我來再拜余幽公耿耿浩氣長於虹  
當年血戰祝陳趙婦孺竝命張許同祠墓臨江怒潮湧  
想公騎蛟會胥種人生奇節本倫常天上雲車待推轂  
大觀亭面水滔滔六出花飛點繡袍皖人秧歌神福我  
旛鼓迎春麥鹿埵

王子潤生作三柏八石四苓圖貽我以余今年六十有四演卦數而爲爻三百八十四齡以喻祝意輒題一律

引伸觀象復觀爻數擬周天閏又交

閏年除小建爲翠三百八十四日

柏三株栖孔鳳雲根八柱隱龍蛟靈芝對對奇成偶探策年年算不淆學擅六書兼繪事諧聲假借妙談嘲

### 五代會

開歲方五日收族五代同我家本蕭山淵源福三公越寨遷黃閣西山氣鬱葱是曰德三祖卜葬景泰中縣縣七世遠增七我所宗四傳逮我祖北宦訖考終我父著

燕籍南望松楸空買田備墓祭追遠晞江楓庚辰我適  
閩始拜馬鬣封族人喜我至簫鼓夜飫豐竭來卅五載  
壯耄蒼孩童三年典浙學錦衣豔鄉農中間八度歸圭  
田將倍充廟祠儼昭穆隴奠芟榛髮二分及寒食割肉  
頒烝糲村塾亦有師十畝束脯供周急視餘夫鰥寡利  
秉稷尺水豈儵樂智井資鞠藁我今持皖節朋來隨燕  
鴻去畱十二人度歲尊燭紅班班五代敘葛藟蟠根叢  
雞豚勸耆弱鳬鷺歌沙溆我老撫孫枝亦解誦角弓榮  
香肥可煮梅粲葩正穠各勉四民業爲善餘慶鍾

喜小迂挈令郎埰至疊韻

扁舟仙侶喜重來掃榻光風幃復開  
鼉辨終郎齡未冠  
雪調張籍酒新醅綠肥秋桂當階苗  
紅綻春禽繞樹徊  
問訊獅林名甲第松根虎珀好栽培

獅子林君  
家園名

### 大雪分韻得在字

龍女吐珠獻華海瓊瑤垂天眩晶璚  
援手恒沙香界霏  
峨眉老宿嫣然待玉皇曼壽開天門  
瑤妃萬舞霓裳綵  
遺簪墮珥裊風輪化作闔浮億葩蕾  
羣天宴罷寶樓歸  
蒐春組練通犀鎧狻奔鵬摔落毳毳  
毫萬校啣枚肅眞緯  
盤陀居士正閉關雪壅黃芽觀自在  
起看滿園綠萼封  
江上漁歌靜欵乃老農醉噉問雞栖  
蝗深八尺麰收倍

黃縣襖出霽霖淙紫陌燈毬耀月彩

聞寶坻王室六妹訃二首

難對紫荆樹凋零汝一枝卅年驚世閱三藐定心持授

妹心經常所持誦

嫺淑尊章順柔勤家室宜生慈今皓髮長慟

更誰依

王郎能謹厚易子望偏深勉讀青箱籍妹家青箱樓頗有藏書難

忘盡荻心百年小別近千轉大悲音子當為妹誦大悲咒千遍度之孫

命何愁苦

子向推妹星命四十外有厄

蓮因尚可尋

作公田記成述之以詩得二十五韻

我家黃閣河面水負西山遠祖始卜宅乃自永洪間德

公生於洪武廿五年卒於景泰七淵源四百載力農常年然則遷居當在永樂洪熙間矣

苦艱日章我高祖擐甲強弓彎傳聞死王事茫昧輪蹄

殷高祖日章公諱尚綱傳聞膂力絕人明末我祖宦遊

北母喪歸狸斑先祖中書公知湖北長陽縣丁母白父太夫人憂扶柩合葬於西山邱家莊

兮著燕籍南望荒榛菅宰樹悲尋縱置田寄蘿攀珪也

賴先澤繡衣度霞關涉江道西興扁舟溯灣環宗族喜

我來歌舞童與頌我思承考志田豐胙可盼

天寵持使節故鄉豔錦還竭來八上冢圭田潔華蘭今

我撫皖江一水通潺湲公田足一頃四世榮

絲綸越寨計畝五追遠義不慳宗祠與近族五十分循



環十畝助鄉塾識字戒蒙頑周急畝廿六秉穗濡俾鰥  
其餘九畝縮官稅供非閒銖黍出廉祿敢溷金夫緩苞  
體念行葦保裕先痼瘵葛藟尚苾本延蔓詎可刪作詩  
告後來家訓期睎顏

次陶生登雲讀黃庭經韻

三田元牝灌萬神黃中該金籙執道契霞書授仙才誰  
爲令神泣何以制齡顏手把玉樹杖足蹈靈關開桃康  
丹元種內芝嬌女栽坐看龍幡舞不憚虢怒摧抱黃侯  
芽苗迴紫流雲堆重樓接銀漢焱駕往復來卮言雖日  
出祕要君勿猜拍手游藥珠相與朝帝臺

皇帝在書房時賜和紀

恩詩韻敬疊寄呈二首

歌雲贊日盛

虞嬀紉縵光華快牖窺自是

心傳先典學況親

身教冠經師園橋刻石文同壽  
左个磨鉛蘊共披何

幸

鐘鏞收注脰不嗤芹曝獻編黎

品題榮溢寶華裝

知遇恩濃

玉案香報

國有心惟夙夜通經致用乃休祥 書帷不隔 三天

雨 詩卷頻分四照光計日 山莊重

霽接

淵源應許問津疆

禽言四首

割麥插禾活活盈科大麥黃燥小麥青坡秧鍼剡剡搖  
曳綠波雨甘露潤日暄風和呼牛叱犢或寢或訛夜息  
早作飽喫餽飪

割麥插禾農忙若何官無爾擾役無爾苛泥深滑滑尻

高背駝燒薤糞水齊唱秧歌秧嫌雨少麥要晴多天如  
汝意晝杲夜沲

割麥插禾起起哥哥抬薪姑姑燒飯阿婆前邨打鼓後  
塍敲鑼黃花金散石榴丹陀黃鸝栗畱白鷺食茄麥秋  
早稻日月如梭

割麥插禾布穀淘河喑喑嘖嘖竊脂須羸燕燕啣泥巧  
婦織梭莫怨姑惡飯心普陀飛去聽法白衣鸚哥迦陵  
仙音般若波羅

雜言三首

夢中視我身幻作我六親或負老父憊或倚慈母仁或

與我昆狎或與我室姻旖旎相憐愛疾痛相噢呻覺來  
乃大悟牌合形與神此我本非我我更誰爲真獨有亡  
是公不言笑而听

人皆愛其體鬼猶戀厥尸此中有三寶與之相憑依釋  
者惡而逃仙欲蛻且飛聖賢敬吾身全受必全歸我今  
作中觀形影忽合離合之成兩美離此主者誰中夜耿  
不寐皎皎光照眉

五年寓官舍四時足盤桓嘉樹交鬱鬱好鳥鳴關關一  
朝舍之去三宿夢未闌我身喻此屋俯仰六十年棟宇  
豈不好雀鼠穿其間脩治勤補葺朽蠹難牢堅有時適

曠野仰首看青天冷然御風列  
初若騎麟韓

恩旨獎賚恭紀二首

經經緯緯煥

天文金鏡高懸萬象分  
精析麟書昭袞袞貫穿焉記辨  
猶薰闡微本自

心傳印比事俱關

治法勤景仰何能窺

聖學愚誠竊哂負山螽

綸褒好語朶雲開  
珠雨深宵喜氣催

時正望雨得雨

疊雪含風

宜變性金壺玉管愧通才  
佩香夢繞含香近

殊賜榮偕節

賜來

是日同拜端午賜藥錠之僂指

螭坳重晉接願隨載筆頌

臺萊

慰吳山尊悼亡

刀尺無聲玉鏡封那堪風雨對花穠  
半生易了三生石  
短夜難催五夜鐘  
短褐鳳雛應索飯  
倚閭鶴髮正扶筇  
知君亦解南華達  
望斷層雲說盪胸

送吳玉松吉士

一尊舊雨憶擔簦  
重棹仙舟慶得朋  
心部定涵金井水

頭銜須耐玉堂冰幾番祝我頌添鶴此去期君翼運鵬  
開濟要從書卷出豈徒高爵賦觚棱

憩東林三笑堂和陽明先生正德庚辰二月作韻  
我夢匡廬拾瑤草潯江片帆風正好今朝颺怒虎溪嗥  
暫憩東林緬三老種桑翁抱江頭哀未言心醉蓮花開  
結侶娑婆脩淨業斯陀含果無往來姚江摩天折大首  
談笑奇勳奠尊酒四無斂手歸太空三立如公眞不朽  
雲峯朶朶排霄庭石門雙闕環洲汀行將觀海騎鯨去  
回首名山萬疊青

度梅嶺謁張文獻公祠



南枝初度嶺頭霏全盛開元達九畿憂國霓裳方萬舞  
潔身海鳥已孤飛雲霾翻憶千秋鏡天闕難憑一柱巍  
過客徘徊仰風度三生誰辨曲江磯

游清遠峽飛來寺

天風送我颿如馳二禺入峽舟暫檣攝衣登岸謁古剎  
殿壁傾倒龍象移崎嶇右轉憩西閣湏湟俯瞰環清漪  
山僧瀟我上絕磴兩吏挾肘憑扶持仰望飛瀑挂千尺  
揮汗透綵涼生肌連理枝樛女猿戲阮俞竹老雄鸞吹  
泉甘試飲定心水丹練未采金巖芝坡翁勝侶此追逐  
松門雲碓畱佳詩塵緣袞袞那得住隨潮直欲觀天池

六月廿有八日閱廣州城登五層樓簡同遊諸君  
軒輿環覽城四周撫衣北上第一樓珠江如帶萬鱗屋  
天風不隔神山洲五嶺以南巨都會海氣腥溼人囂浮  
桂苻出沒蛟鱷橫雲茶逐靡綦縞羞蜃臺貝闕蕩心目  
爲利熙穰甘饕餮番艘連翩逞淫巧地險倔強夸趙劉  
聖朝威德輝四表安南咭喇虔共球吾聞撻外先鞏內  
馬剛善馭轡則柔陽鯨爭吮盜泉水繭絲寧免蠶織休  
潮陽太守曲江督到今尸祝猶歌謳鰕生竊有伐檀願  
負乘致寇慙蠹存物煙自動鏡自靜觀民觀我神瞰幽  
得情而喜吾何敢中孚或可豚魚求仰天呼吸通上緯

敬告僚友欽鞠謀挈瓶之智不失守銅壺漏箭貞枵姬

雙門樓觀銅壺滴陋儒高塘豈不忝

恩深肩重難言酬山川信美非吾土輕裝歸去身早抽

### 送許春巖方伯告養歸浙二首

甘棠久蔭海山偏翠羽明珠意淡然歸趁湖鷗宜放棹

譜將陔雅侑長年官聲夙比臨風鶴家學重尋舊日氈

尊大人爲試看羊城香滿陌口碑爭說使君賢

蘭譜淵源雅不忘

珪與方伯尊人同舉丁卯鄉試方伯座主耳山憲副又出筭河先兄之門

相逢燕鴈遠于將

予來甫越旬日而君卽行

春暉玉樹枝層映

孝令嗣

克承秋老黃花節更香天與完人歸錦晝時收霖雨愛

榆光寄聲角里馮方伯

謂星實鴻臚

好繪荀龍過二方

七月初六成之姪忌日

咫尺浮山麓來游意若何  
林風空萬籟海月印三摩  
掃洞心眞換過庭性不磨  
應憐老癡叔辛苦到南訛

甲寅夏杪晤舊友徐殿颺秀才於廣州感而有作

五十年前與君友君頷求髭我卯首五十年後今謁余  
錯愕相視霜髯鬚笠簦車馬夫何有萬事浮雲幻蒼狗  
問君何事到羊城河干先生方出守凝香官閣半生徒  
縞紵尚有錢塘吳

謂吳大聞生

蒙戎充耳返鄉井宿草已蔓

孤山孤野鷗曾意張方海

名秉嶽君因方海而受業河干師之門

文奇詩

險驚眞宰方千未賜及第魂玉川無復添丁在先生八  
秩老靈光我持使節頻升堂誦君五字傳衣鉢詞清味  
永嚴滄浪窮益工詩羞乞米獨操成連嘯海水十觴綠  
蟻開酤顏誰識當年徐孺子

皇帝在書房時以珪奏請

陛見未蒙

允准詩以寄懷敬次元韻

向日身南行依斗心北指五秋西來風三江東去水自  
我別承華中宵夢未已鹿鳴思萃芩魚麗歌鱸鯉相  
望星火流不隔

天光咫尺拜對揚休鶴和同心喜何意朝宗稽更荷  
池徙徘徊念經幃懽暢捧

綸旨雨寒尚思其珠翠姑舍彼飄飄雲中書忽向天隅  
委情深文逾明道遠心在此進修密三餘懷袖盈千紙  
湛清堂卽事次戴蓮士學使韻四首

恬智於何較寂喧誅茅開徑得林園萬竿脩颯疑無暑  
一頃灣環信有源茂叔恰宜蓮共愛米顛漫詡石爲尊  
平章更植梅千本坐臥羅浮艷不言

蜚雨方闌積潦收晴光穿漏墨雲油探驪洗眼宜休夏  
君試士求牧關心屬晚秋炎海新輪驚轉轂予到粵東  
方竣

蓬山舊侶愜同舟披榛要待黃芽茁相與還期物外游  
忙裏偷閒四大身娑婆淨業辨根因鏡臺蟾度還相印  
蓮葉魚穿不動塵八海酸鹹殊嗜好百年辛苦漫沈淪  
與君樽酒論心夙更向漁舸認去津

石華海月若爲探咨雨占風夢自慙上士應知仙換骨  
難兄曾憶佛同龕

謂臥禪居士

濠脩雙樂遊偕惠璧馬三言

寶竊聃對論高松真不厭木樨花發好頻參

### 登肇慶閱江樓

雄樓四達開軒窗負星

七星巖在其北

面鼓

銅鼓山在其南

臨西江賀

梧遠導自黔鬱高峽近東收崆峒端州形勝實都會氓

俗剽悍其言咙東南距海四百里三川匯合迴奔瀧今  
秋江漲釣臺漫睥睨俯汲摩梳鬣怒潮上涌建瓴下兩  
雄勅敵誰肯降兒啼登屋魚入巷羚羊倒咽號羊腔田  
園冲決廬蕩析磬鳴四野愁津缸節府西經惻跋履飛  
書告我吁洪澤連名請命上

閬闔遙宣

堯禹恩悖厖便宜散利拯疾苦扁舟暫纜存雞虵鎗銖  
升勺計口率睢盱憐此情愚憇晴光及旬水歸壑晚播  
尚可疏豆豉艱食鮮食

帝之力鞠人謀人心則懣據高俛下仰天咫呼吸聲應



凌空登朶間星使勒長句

前學使翁覃溪有七古

健筆頗擬龍文

扛邂逅許生七閩秀

庚戌進士許作屏客郡署偕遊

哦詩浮切精敲撻

嘻余民瘼費求度雅興束手臙走龐水監何有稻螬急

海國善幻魚龍槿牧羣去害告僚友信美非土嗟此邦

力微責重三自省擇取那得熊魚雙何當歸去老齋个

玉樓挽水車淙淙

望斗

我來天南東西北望珠斗方知地輪移已逼左海右宦

游豈不遠萬里頻回首匡衛環極辰星槎轉月酉受

恩逾高深我行忽永久初心愧羣黎晚節畏益友五年

感鴻飛何時親鳳藪良夜獨徘徊永言戀乘負

乾隆甲寅

恩科駐監臨院次德定圃前輩庚寅辛卯川午科詩韻

四首

匡衡應連匡戴傍珊枝照眼屬提綱弧南星見開丹籙  
斗北光分閤玉堂璣院同持槎使節隔簾遙度桂宮香  
平生屢忝司冰鑑到海還誇選佛場

江南舍筏海南移拾月牽華又一時寶氣排沙憑夜識  
空羣嘶影要心知人間玉尺非無度天上朱衣更有司  
寄語觀潮袍擁鵠使君火急擬催詩

鴻漸高秋玉界寬參橫漢轉正芒寒珠江不少騰龍劍  
春嶺誰拋抵鵲丸六乙權衡憑左右三門咫尺豳檀園  
捷書夜報如茶火自哂諸侯壁上看

大書深刻棟榱間鈴索無聲鎖閉闕後閣品題頻鄭重  
前型風雅尚追攀三眠好聽蠶絲軋一矢驚看雉子斑  
知有文章華上國豈徒琛貝輳交蠻

送胡果泉郎中使旋

九江澤東匯靈瀨鍾伊人求生協明允論文必清醇鉤  
墀拜使節珠海搜瓊珍傾蓋接衡宇抒悰懷抱申老我  
喻農馬岐路咨涯津君如出水劍高躍凌星辰我如撓

棟桷半蠹空輪囷相見旣云晚欲別重逡巡何以爲子  
贈珙璧先駱駟斯道或不遠求已莫問鄰上善貴善下  
百谷輸齋淪不見黃庭說積此和專仁活人逾千計蕭  
然遺厥身湛湛西江水可以鑒吾真

送錢湘舲宮贊使旋竝簡同直諸公

壽夭無量

恩敷覃斗車戴匡星指南誰其使者翰林伯五雲高甲  
魁象三駟哉錢君巍第矗沂國文毅遙斬驂承華侍經  
式風度拱揖肩袂快盍簪輕輶度嶺下滇水仙舟入鏡  
芙蓉函拔交老眼燭見跋五雀六燕權衡堪驪珠一握

果照乘選佛與我疑同龕

君所取釋元葉鈞乃子首偈一指者

清樽相對

傾素抱如君慧業眞優曇聲名官職亦何有視履蕩蕩  
摩蔚藍前因何所好自證莫令蓬嶠迷煙嵐我衰已苦  
到岸晚纏縛未了三眠蠶君今五十心尚壯濯手錦漢  
霖施甘星槎此去渡江北匡廬眞面憑君參舊巢好在  
鳳侶萃風味清絕方傳柑瓊樓高寒隔塵界遠夢猶作  
騶生談他時握手應大笑番髮相視誰鏗聃

恭和

恩賜

御筆書扇甲寅季夏題秀起堂詩元韻

臨流聖喟然拈花佛莞爾是實無卮言非空有妙旨山  
靈環貢秀

心鏡印精理東坡物外游言詩商可起

揮扇來薰風木樨香到此

馴遠伏柔象歌

我

皇揚武崑崙西六牙馴伏金狻猊么魔廓喀狼載跋小  
醜用壯藩觸羝

天兵飛將渡青海下壓峨嵋綠萬仞低熱索橫穿雍鵬隘  
帕朗直上懸猱梯七戰七捷偏陽布百里架入庭將犁

降幡夜豎鼯鼠拱乞命

天子完旄倪

帝德好生湯網開

天所燾育皆蒼黎昔彼歸降今則順面傷不獻來非迷  
噶箕酺飫 紫光宴

鈞天樂震謹任鞮巨象蹢躅迂萬里隔歲乃至偕駿驤  
厥高踰丈雙突兀載瑜不動金月題

錫名伏柔與馴遠緬花掌子隨牽奚對仗牙排地負嶽  
御河鼻飲天垂霓寶瓶莊嚴秋駕穩

宸章鄭重

皇穹視象乎豈忘戰身毒海今不沸收鯨鯢  
十全功成四靈畢瑤光長朗星聚奎

紫雲騃鳳臆駿歌

馴遠伏柔之象何崔嵬紫雲鳳臆聯翩西極來散羣  
哈薩克與布魯特念爾蹙踏青海冰皚皚拉特納巴都爾  
所跪獻達賴班禪分

錫榮龍蹕噶箕奉表宴賚已歸去天閑八駿四駿今  
追陪

八徵

天子調御六龍健此馬亦得按轡隨鞭枚



作詩誌事憐彼跋屨力

武功

天贊偃伯歌靈臺是惟懷遠在德不在物乃信專精厲  
意通

九閼騃乎踣玉駒駿驤厥首詞臣第頌天驥同呈材自  
今至于百千萬億歲吉疆乘黃壽共

天增培

十月二十八日祀南海神廟觀日出紀事

祝融帝衡嶽南海王德同孟冬秩禋祀厥惟既濟功我  
來捐嶺疆壤莫敢不恭前期致齋沐棹舟溯清風五漏

謁廟陞鵜首星正中祝神捍民患盪滌鯨鯢兇孽以雨  
爲雪施潤膏稔菰監我求瘼誠陰隲亮天工禮成復端  
坐待旦晞暎東右上浴日亭鈎月宛仰盅淺繡間淡碧  
綺霞漾青穹參魁朗相枕引手摩張弓久遲虹散海沙  
嶼分迷濛幻景出洲西吸縮眞冲融橫陰貫離腹銜璧  
黃金釭漸升大圓鏡四圍懸玲瓏蒼旻久未合搖蕩方  
嵌空須臾光四射誰能睨重瞳憶昔岱嶽頂觀日體不  
曹凹凸赤瓊瑰嫋嫋未磋礧何常辨眞象上與羲和通  
旋臚聊紀述願言叩鴻濛

聞馮壻秉驄耗傷之

楚楚稱翹秀居貧氣自豪當年期國器中路解天弢桐  
邑那無食桃津或有舫獨憐雙弱女孤露更嗷嗷

喜姪孫澄秋捷

億爾初生夜宜春肇錫時

姪孫生于丁亥立春之夜仲兄賀伯兄曰是兒母陶父朱

贈以乳名富春云

光陰催我老科發又孫枝

子與兩兄連科出身子姪輩得五舉

今孫又發軔矣

晝錦隨斑舞

伯昭姪奉差入京

重闥展案眉

兄嫂齊如眉稱慶如

何保餘慶方寸是鉉基

寄問庚姪

阿咸原不俗摘阮貴平和性火柔剛濟慈暉霽豫多讀  
書先化質學道必祛魔耐得黃齏味遺編屬小坡

喜雨東長制府二首

敢說禱能應從來

天愛民疎疎鳴葉乍密密滴簷真炎地同三白

粵東以雨爲雪

靈膏間五旬願將一夜渥濡灑十方勻

節府心同印前因化雨多端來華世界徧布曼陀羅虔  
達龍宮闕清澄鱷海波自看笠屐相歸夢繞煙蓑

過三水望雨

六旬未雨河落灘三水西北尤咨艱夏秋苦潦冬苦暵  
二麥芋蔽愁民餐我昨籲龍兆已見爲我起蟄濡鱗鬣  
久晴作雨雲氣澀江海助勢宜推瀾月行離畢入北道

細爲霖霖濃濛濛來牟青青霜犁發早禾剡剡秧鉞攢  
嶺南節候異中土歲飽三熟衣忘寒陽和發泄四序錯  
外強豈免中則乾火房水濟雨卽雪天從民欲施甚寬  
陋儒無功食天祿每飯竊念農桑難萑苻未靖海氛惡  
逸淫遠善爭鑿剗何當元氣復惇朴不用救急勞纓冠  
勗哉有心各努力雲根呼吸安于磐

高要謝檢討啟祚百齡有二

耆英九秩賦寶興

丙午舉鄉時年九十有四

仙侶瀛洲大蠶登

丁未

欽陽檢討

五代添丁成六紀

五代一堂共五十九人

百年數甲又雙增

最難嬰鑠衣冠稱真見康強揖讓能好報

八徵

天子聖海隅三壽恰爲朋

同時百齡尚有陽江一人惠州陸豐一人

聞韓馬平廷秀凶耗

官以窮而縊訛傳詎忍聞娑婆眞惡濁容易喪斯文空負詩書腹應傷孔翠羣蒼梧蠻瘴疊何處寄孤墳

示吳生慈鶴

吾觀吳郎文歆玉輕萬里華河兩摩挲夸娥挾而徙如登希有脊忽掉巨鼉尾點竄伯翳經孺臍文選理乾坤得清氣萬怪簸糠粃其年未弱冠三舍走臚起騏驎老始成鸞鳳不受滓積善日加益嗜古醇更美鬢鬢出頭

角惜哉吾老矣人才爲世需藻績非華已吾聞莊生言  
惟虛吉祥止又聞濂溪說實勝車合軌虛心實其腹吾  
以贈吳子

答吳生慈鶴古詩一首次其韻

秀靈匹兩大人才莫卑高心聲發三籟氣壓江海鵬夙  
慧得吳子峩峩冠譽髦芙蓉映暎日赤城吐霞標我衰  
好技彥識寶老眼昭愛其健扛鼎筆陣雄撫標長河出  
崑崙曲折千里濤獎蹴贈以詩牽率徒謹饒瓊葩忽投  
報萬靈擁紫輶上言六籍與秦火完繇及華離詩與書  
矛盾同室鏹中言保氏教許蔡篆刻勞十鼓迷趨趨九

奏亡章驚下言著錄手萬馬誰勒鑣子長轡一龍昌黎  
肇諸毛淵源染流別精理棄魄精智珠洞重闥鳳髓煎  
合膠感子大叩勤震我充耳諺子誠天廟玉底用鬼斧  
雕子如真蚪螭無取葉畫描于將一躍冶百怪皆遞逃  
惟當肥其本蕃衍盈碩椒多聞闕所疑好古慎詆訾爲  
善日不足辨義躋可鑒夜光照赤水晨鑑清蒲牢保此  
善者幾靈鏡獨存操養我正直氣勿使萬態淆湛如虛  
室水瓦礫誰敢拋謙能王百谷河伯空夸嗽後猊蹲深  
山不逐貔虎號德成格神聽勿顧人譽嘲出門考視履  
上達天路遙俯睇小知者螻蛄與區鼃施物霖出嶽正



我辰建杓金石在中流肯與羣動漂噓雲扶章漢漸鴻  
儀赤霄樓臺詎幻蜃風雨看化蛟憶我十六七頭角初  
髡髡欲甘脈望蠹不作蚯蚓號牆面未優學干祿早玷  
朝攤華飾盤悅執禮疎蒔茅養疴廢鉛槧繕性苦御調  
衡峰瞰泊鳳閣海參鈞鼇橫汾歌伐輻濟漢懷播昭黍  
棠惡郇邵獄愼希蘇咎宦久悵歲月賡颺覲耆姚舊巢  
歸三島小宰聯六曹講幄先經史藝游後莊騷沃根必  
洙泗絕源屏金瑤芳苑使節駐楓嶺輿輜超似陵摩窆  
謁錢江狎礪磻浴月上岱觀揚颿竝金焦散材易擁腫  
小受難容包牧咨更晚寧器使慙鈞陶政學盡無功

外誰能勦後來吁可畏  
鯤運嗤堂劫與善何必我  
鵲聲  
韓膠  
荆子隆  
亲棟  
豈惟挾  
雄褒  
焚香師  
清獻  
陽長陰  
沴消  
寄聲老  
梧鳳  
作德  
培丹毫

咏佛手柑

一拳嫩簇雪山芽  
香逗祇園老衲家  
海印發光初按指  
兜綿試手欲拈花  
雙垂金臂根無著  
六解波羅結不加  
此果只應生淨土  
青蓮與爾共莖蓮

知足齋詩集卷第九終